

## Bidaah Mandi Safar

Selesai Muhamarram terbangnya lesap  
Safar pula datang berdesap  
Menggantikan Muhamarram mengambil şaf  
Menurut peredaran perhitungan hisab.

Kita ucapan selamat bersafar  
Lepas bahaya kebulur dan lapar  
Di dalam bulan naħas berkpar  
Mengandungi berbagai haru dan sampar.

Konon yang melebihi di akhir Rabu  
Nahas dan malang turun berdebu  
Jika tak cukup perisai dan kubu  
Berbagai bencana datang menyerbu.

Dari itu larilah keluar  
Meninggalkan rumah, bersolek melawar  
Yakinkan XXX<sup>1</sup> jampi dan tawar  
Boleh melepaskan sampar dan hawar.

Keluarlah berpamlah beramai-ramaian  
Mabuk bersuka bermandi-mandian  
Gong gendang, tari bunyian  
Menolak bala dalam tempayan.

Demikianlah setengah punya kepercayaan  
Bulan Safar banyak kecelakaan  
Bila disiasat hadis dan Qur'an  
Nyatalah bidaah berlebih-lebihan.

**Qur'an hadis tidak menuduh**  
**Bulan Safar harinya hodoh**

**Menyebabkan bencana tengkar bergaduh**  
**Semua itu sangkaan bodoh!**

Bodoh akal bodoh ingatan  
Bodoh kelakuan, bodoh perbuatan  
Boros, maksiat jadi ikutan  
Semata membazir berikhwankan syaitan.

**Cuba tafakur fikir perlahan**  
**Jahat baik takdirnya Tuhan**  
**Kenapa tak sujud mohon kasihan**  
**Lepaskan daripada segala kesusahan?**

Mohon dilepaskan XXX<sup>2</sup> bala  
Demikianlah cara bencana bala ditolak  
Takkanlah susah: berjoli pulak  
Menari, menyanyi, terlalak-lalak?

**Di sinilah nampak terang dan nyata**  
**Iktikad bersafar bulannya lata**  
**Disambut dengan bersukacita**  
**Suatu kepercayaan yang amat dusta!**

Adakah munasabah sabit di akal  
Kepada Allah tak mahu tawakkal  
Bala bencana dapat disangkal  
Dengan maksiat, membazir dan tangkal??

**(Dari buah kalam almarhum Pak Lomak yang telah**  
**tersiar pada 10 tahun yang lalu dalam majalah ini).**

<sup>1</sup> Kesalahan ejaan teks asal. Perkataan yang dimaksudkan tidak dapat dikenalpasti.

<sup>2</sup> Teks asal tidak jelas. Perkataan yang dimaksudkan tidak dapat dikenalpasti.